



0 1cm 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

deli 得力集团有限公司

新字02260122号 No.6230



161167





石溪詩鈔卷之五

明安寧物一市

開包



日人

武功康

北地李

分符仗鐵幾登壇... 行洛難性本... 是球非兩世... 身... 合休... 未赴... 補... 會... 的... 開... 本... 聊... 隨... 雅... 子... 歡... 大地... 不... 口... 下... 衣... 然... 然... 然...



石淙詩鈔卷之五

明安寧楊一清應寧著

門人

北地李夢陽

武功康

海

編輯



開徑

分符仗鉞幾登壇歸去豈關行路難性本迂疎非用世
身多疾疢合休官閉門未赴鄰翁約開徑聊隨稚子歡
天地國恩慚未報夢回雙闕可能安夢陽曰用世之志
雖老不衰然恬淡
之趣
少矣

雪景長句禁體

老狂醉圖三尺帛不圖麗景惟圖雪高堂六月寒逼人
不似常情附炎熱玄冥令嚴何栗烈癡雪盡昏天宇黑
行人有口不敢開面皮皴破足爪裂古木鱗張矯欲騰
峭峰壁立危難越徑滑猿猱不得上水冷鯨魚未堪掣
鷓鴣飽肉鷗鷺饑咫尺悲歡各差別市肆忻揚得估宿
山橋懼失歸商轍東郭先生履尙穿谷口負薪休更說
行吟坐嘯者爲誰目盼南枝自怡悅詩髭欲撚冰先斷
琴指未揮絃已折世間豈少清曠士不獨廣平心似鐵
向來憂樂勿重陳且聽農兒頌宜麥敢言爲瑞不須多
自古豐年兆三白

睦拱貞所藏沈石田山水二圖

可人對局開畫圖索我賦詩如索逋亦知二者皆戲劇
況乃聰明非故吾少年山水興不惡老大一官成束縛
石田神交未識面仰瞻高鴻雲漠漠布袍芒屨烏角巾
無乃斯人自寫真誅茅結屋占幽僻有脚不踏長安塵
濃花萬點亂晴晝好鳥數聲啼暮春嗟予謝病不出戶
對此稍覺怡心神局終詩就畫亦返清風徐來白日晚
夢陽曰一句願君拂拭頻借予爲洗煩襟豁雙眼
迂徐有味
田稿中長篇惟此以下四篇爲最以格
之高也夢陽曰二篇似杜後篇更好

石田毫素久擅場此圖云贈東用光詩才字畫亦不俗

畢竟未奪丹青長山高水濶鳥飛盡叢杉集篠迴林塘
蓬門蕭蕭絕車馬落葉不掃苔蝕牆松根兩翁相揖讓
狀貌奇古鬚眉蒼豈無王猷棹剡曲或有孺子歌滄浪
青菴好畫真成癖用光割愛不自惜楚弓得失皆吾人
寶劍烈士非輕擲白石清泉無處無世有真樂寧在圖
青鞋布襪誰為侶吾已拂袖歸江湖夢陽曰慷慨豪蕩

錢宗玉所藏王元章墨梅

吾聞王郎傲世者白眼看人氣凌駕平生好為梅寫真
一幅未論千金價古枝樛曲老不凋渴龍下吸長江潮
微雲墮空成點綴清風近人疑動搖夢陽曰二句與梅同神 世間

尤物信不妄意匠無乃經營勞何遜林逋俱已矣冰姿
玉骨無知己鐵心石腸徒自許此圖零落知幾年錢侯
愛之入骨髓君不聞物之顯晦良由人浪傳仙筆能通
神

題閻允德畫贈孫廷賢

閻生拂袖歸隴山風韻盡落毫素間

夢陽曰起句好甚

黃花茶

竹傍幽石嫵媚恥爲桃李顏初疑羣仙出園苑金冠絳
袍相追攀又如壯士挺高節直教閭闔呈琅玕丈人坐
受兒女拜氣岸俯視千嶺岼當時下筆亦偶爾至今尺
紙迴波瀾

夢陽曰四句氣壓百代

南徐孫生號奇士爲道畫意非

無端豈徒狀氣兼比德人情物態元相關我公功成合
身退小子終當托肺肝愛生賞識爲生贈莫遺肉眼紛
相看願言對此成三益共保貞心盟歲寒

夢陽曰亦是杜格

聞屋舟先生初度走也浴德有素尙阻登堂感怵
之私徒深頌祝敬成長律用代壽觴之獻情見乎

辭

鷺花滿目慶長生未到賓筵意已傾瑞祉載回南極彩
德星羣集少微明詩才直與春爭麗心地惟應水共清
濃淡墨花聊適興深淺杯酌自陶情探奇獨結桃源契
避俗頻尋綺里盟橘井恩多猶世業屋舟跡古更時名

鏡顏華髮添來少
火候丹砂養欲成
青仗倚龍觀月嶠
玉章傳鶴聽風笙
沙頭鳥狎忘機客
石底泉流洗耳聲
杏澗春林栽後實
菊飡秋圃落時英
堂前荆樹應常茂
階下蘭芽已競榮
絃管沸庭歌雜沓
斑斕繞膝舞崢嶸
笑看阿囷呼郎罷
謾說錢鏗祖大彭
入座香雲飄羽帳
半空涼露浥金莖
南山松柏年俱老
東海塵埃望屢驚
三世通家孫又子
幾人異姓弟還兄
願從芳社聯佳約
擬共康衢話太平
記取重三前六日
長陪仙侶醉蓬瀛

夢陽曰此
詩平正

何君竹逸持此圖爲惲君雪江壽索予賦之

小仙酒酣圖老翁神氣炯炯雙方瞳
 粵從西池謁金母錫以一粒蟠桃紅
 憚君家在大江東瀛海咫尺蓬萊通
 生辰開宴集賓客正及春王正月中
 願君眉髮如翁白啖盡山桃種其核
 一年一宴三千年看桃開花更結實
夢陽曰此篇如半醉拓載意氣逼人

與睦拱貞手談張宗義限韻

閒把春情伴局棋更排孤悶為裁詩
 病來盃酒交歡少老去鶯花引興遲
 芳草到門還舊色夢陽曰妙句浮雲過眼
 亦多奇凭欄無語悠然坐心事唯應野鶴知
夢陽曰好結

題畫送上國賓

楚物偏宜贈楚人月明霜白楚江濱
歲寒采摘俱堪賞何必秋蘭獨可紉

采采黃花歌竹枝湘雲楚澤夢中疑
十年塵土天涯道

歷盡風霜是故知

夢陽曰此首佳

送張宗義之汴二首

作別本無近爲情俱可憐不知從此去
明月幾回圓

夢陽

曰此首佳

我病勞相慰君胡復此行停雲未足論
須念倚門情

沈石田山水爲南京守備劉公賦

金陵古稱形勝地我祖開邦作之對
石城鍾阜龍虎蟠

長江西來渺天際雨纜風帆日夜浮層臺傑閣烟花麗
雞鳴牛首信幽絕我昔追遊心欲醉蘿攀蹬躡不可窮
更指深叢向蒙翳雲水長和島嶼青衣襟半染嵐霞氣
十年奔走徧西極南國山川徒夢寐歸來臥病不出門
偶然見畫依稀是石田老翁人品高平生落筆皆風致
此圖經營復精妙冥想立搜入心記細觀崖石有親題
始信翁年八十二潦倒人間毫素流惡石繁枝莽兒戲
聞翁近年不苟作至寶若爲乾坤秘臨汾劉公好事者
公餘講學兼游藝曾勤書幣走三吳巨卷長辭亟相寄
謾誇人以畫爲珍豈知畫復因人貴倦揩雙眼一賦詩

詩不稱圖翻自媿高天素月留餘彩落日長風發青吹
祇緣神物難久留什襲還公附郵使

夢陽曰
大作

戴文進畫五絕句

江湖心事自年年日暮風波或偶然高臥滄洲看江月
中流猶有未歸船

平生山水興不惡都向無聲句裏尋合有高人擅幽獨
野橋行子定知音

江南山水故清妍何處嵯峩勢插天曾向太行高處立
分明山脚起雲烟

飛泉噴石四時雨細柳新蒲三月風好是江南佳麗地

烟花臺閣鬱葱葱

夢陽曰五首
此一篇勝

人人解道靜菴晝
肉眼誰知鴈與真
君看芙蓉出霄漢
霜毫真箇可通神

送劉舉人倫

蓬門驚見玉人來
有客緘書下鳳臺
別後幾年勞客夢
病餘雙眼爲君開
交游骨肉平生念
文武衣冠伯仲才
男子要爲天下士
宮花看映曲江杯

補寄錦衣千戶劉君儒二首

故家門閥重臨汾
服武平生更好文
三箭龍沙曾相我
一編黃石喜逢君
江湖歲晚飛鴻盡
關塞秋高落葉聞

幾度懷人不成寐
緘書聊得慰殷勤

江雲迢遞隔秦川
却憶談兵自昔年
老我疎慵招物議
羨君才畧是家傳
功成俯拾金吾貴
興到高吟白雪篇
黑髮勳名從此始
莫將心事媿前賢

送唐雲卿之臺州推官

丹徒唐君雲卿去年舉於鄉
連得進士未幾有臺州府節推之除
便道過家拜其父母兼畢姻事
一舉而衆美具焉樂可知矣將之任
予以通家道誼之雅爲賦二詩賀且餞之

五雲釋褐聽鳴珂
晝錦歸來樂事多
載路爭看新進士

填門兼賀小登科仙橋駟馬題猶濕春酒高堂髮未皤
不盡通家桑梓意相逢無幾又離歌

祈天一脉是祥刑三尺何曾廢六經謾道書生終讀律
早知家學自趨庭蕭蕭紅葉鳴秋籟采采黃花薦晚馨
東望赤城應不遠政聲須向口碑聽

解印歸來晝掩扉老懷真與世相違科名後進呼前輩
壽算今年過古稀合向椿庭誇五桂早從家世慶重闈
小春天氣華堂燕白日清尊照錦衣

相過曾泛剡溪槎京口毘陵路不賒看竹長懷蔣詡徑
開樽欲醉陶潛花榮名過眼祇一夢至樂如君能幾家

欲向長生問消息要看滄海生桑麻

贈句容尹劉德機

少日風雲起筆端燕臺門闕舊衣冠讀書只說爲官好
用世方知作縣難文獻地應先禮讓催科心合念彫殘
牛刀亦是尋常事須向盤根錯節看

西涯門下托交親又作傳經問字人老我平生曾造士
喜君才調獨宜民清風莫夜庭如水赤縣謳歌脚有春
桑梓句容應咫尺思君安得見君頻

夢陽曰此上九首皆堂堂之作

沈石田三吳山水卷

職方有藪名具區三江之雄五湖腴碧桃萬頃玻璃色

生意頗仰隨鳶魚千巖萬壑共拱揖林木蔥蒨蒼烟集
翠微依稀入空莽茅堂生苔土花澁洞庭山連明月灣
柳枝蘸水濕不乾石路縈紆穿細嶺陰風淅瀝生高寒
固知開鑿自天地雖有雞犬非人間有誰獨往占幽僻
孤松鎮日相盤桓有誰臨流不洗耳仰面踞坐聽潺湲
有誰輕舸泛寒綠酒酣耳熱回朱顏高山一曲不可和
丹崖千仞難爲攀我生足跡半南北長載圖書隨傳驛
吳帆三挂不一遊老大追思空太息豈應好事不相逢
或者山靈闕題籍誰爲此圖石田翁病眼摩挲似粗識
谷口浮雲乍有無澗邊野草仍蕭瑟此翁胷中富山水

興到不待相督迫鑒賞再遇今劉侯此卷此人非偶得
并刀欲剪恨不能詩成畫去長相憶夢陽曰亦以格高
又曰好篇末句脫
然

錢舜舉漁翁樂趣圖

漁翁樂漁翁樂祇向烟波寄生活長江水明魚潑潑入
手不厭霜刀割前村老嫗新醅醱沽與妻兒恣歡謔世
間萬事耳不聞兒啼嗥嘍猶苦聒兩舟結鄰自來往翻
笑屢居真事縛嚴陵羊裘不無心渭濱後車那可奪江
淮以南罟罾多五湖三泖皆風波漁翁之樂樂如何擬
樵山中懼豺虎欲耕戶外愁征科黃蘆瑟瑟秋風滿何

處寒江無釣簑漁翁之樂不用一錢買請君試聽滄浪歌

雲津書院詩卷爲太和劉教諭啟賦

乾坤靈氣融爲川舊緒漫滅今猶傳萬古綱常水行地
一方人物龍躍淵學如前輩直希聖澤裕後昆多象賢
便合爲雲雨下土九五時乘方御天

前輩日以遠斯文今在茲龍洲擅奇勝書院有遺規補
袞真華國爲霖合濟時要知堂構意卷裏寄深思

遊茅山雜作

出郊

向來塵慮已真拋一臥經年始出郊天下華陽稱八洞
人間福地是三茅病求仙术聊充餌老愛雲松願結巢
夢覺迷途自茲始北山猿鶴謾相嘲

曉晴出遊

十日窮陰始放晴秋光經雨更分明丹梯路接三峰近
捫薜攀蘿取次行夢陽曰所謂何天之衢者

坐上宮道房

瑤堂正對大茅峰一日閒行萬慮空青鳥夜歸元圃月
碧桃春綻玉臺風上方樓觀天應近古洞蓬萊路或通
便欲尋仙還自笑夕陽芳草茂林中夢陽曰此等句足破百世迷仙者之

感

華陽道中

望入華陽路青山與世分
漁樵坐相語麋鹿晝成群
夢日古詩漁樵不到麋鹿成羣
今到香氣諸天近鐘聲下
處成羣矣足見山之深且大也
界聞夢陽日二句平生愛真隱亦欲禮茅君
又見山之高

華陽洞

古洞陰陰石壁高坐聽仙侶奏雲璈
神仙草莽今陳迹空憶吹笙醉碧桃
坐久衣巾上綠苔白雲深處是瑤臺
道人細樂頻頻奏勾引真仙出洞來

登大茅峰

茅峰最高處俯視千崖壑決皆入空無馳情向寥廓明月印池心白雲起山脚仙翁莫相訝吾已辭束縛

與范元博手談

茲山古洞天茲人今國手吁嗟兩奇觀得之良不偶少年愛局戲老大猶故醜小巫見大巫安得不低首神仙不可窮爛柯豈真有翻思專門人爭長動相詬蛛絲碧落狂虎穴青山瘦終然付一笑得失竟何咎因君悟三昧頗頗善持守我欲盡君術此意不在酒局終振衣還夕陽掛山口

喜客泉

望窮林麓與山顛又醉仙家喜客泉亦有閒愁驅未盡
且隨魚鳥共盤旋

巧石亭

仙家怪石似羣羊束帶相看坐夕陽我醉欲眠難下拜
風情真媿米元章

送戴揮使江西監兌

侃侃萬戶侯別我江西遊臨歧遺我絹七尺要我賦詩
壯行色知君不是汗漫行憲臺飛檄嚴王程一方轉漕
賴監押兵民命脉須關情摧堅解紛良不易自古盤根

知利器莫言異地不相謀須把一心勤國事姑蘇山水
錢塘湖桐江之上如畫圖鄱陽秋風渺空濶匡廬秀色
凌虛無公餘登眺飛觴舉去歲東君今在否囊中詩句
動百篇處處逢人皆快覩丈夫生來志四方紛紛株守
限封疆君才磊落眼前少雲夢胷中未可量

夢陽曰
大作

送楊太守遷四川提學

讀書讀律兩取功爲吏爲儒道本同無計南州畱召父
有緣西蜀得文翁先聲迴出飛霜外春色都歸化雨中
末學紛紛久彫敝頽波誰障百川東

夢陽曰
堂堂

向來學政少全功妙選今非舊格同作郡循良追往哲

過庭詩禮自而翁斯文未喪時方泰吾道分明日正中
老我通家從夙昔送君心逐暮雲東

夢陽曰
堂堂

酷暑行 六月十八日

建未之月伏更初祝融仗節天南隅火龍前驅朱鳥後
陽烏助燄燒寰衢六合茫茫同塊炭山髮為童骨將爛
海波沸鼎鼎欲乾天吳震懾鮫人竄彤雲萬疊凝如烘
熖氣經旬呼不斷雷霆虛無雨師懶翻遣旱魃真稱亂
物在炊甑不可逃燥者出火液流膏飛鳥憎羽獸憎毛
崇堂密蔭日卓午轉覺纖絺成緼袍晝蠅宵螭聲噉嘈
病膚那復禁爬搔如燄如焚廢食寢忽坐忽起煩兒曹

鋤禾負擔暍幾死使我念之心孔勞願排清都決銀漢
冰壺一瀉消炎歆濡焦植撲在頃刻不待金風秋氣高
夢陽曰
大作

送陶公甫之南昌訓導

碧雲仙路幾升沉苦盡年來抱玉心齊客叩門無錦瑟
燕臺求士有黃金文章星斗芒終在名教乾坤樂易尋
早聽棟梁榱角詠莫教霜雪上冠簪

夢陽曰堂
堂正氣

郭于蕃以便面請題爲書短句

南山之麓有亭翼然匪地斯僻心遠自偏青松堪撫白
石堪眠俯觀遊魚仰視飛鳶真樂在我我何歎焉黃塵

塞途浮雲行天其不自我勿礙我心田

夢陽曰此作類箴

金山與王揚州別後口占寄贈

欲擬停雲賦未成金山寺裏晚潮聲
臨流試汲中泠看好似君心一樣清

次李獻吉贈張宗義韻

小坐籬邊日幾迴江頭不作杜陵哀
眼驚世事如花過耳聽秋聲帶雨來
野菊經霜甘隱逸沙鷗忘我故遲徊
時行時止吾人意漫說雲臺與釣臺

夢陽曰細潤之作

題竹屏

春風滿座玉為屏占斷淇園數畝青
世外一塵無處著

夢餘雙眼爲渠醒影疑鸞鳳空中下聲訝蛟龍雨後聽
回首侯門雲錦障豪華能得幾周星

夢陽曰
堂堂

瑞麥爲揚州王太守賦

有人江北傳聲歌廣陵四月薰風和黃雲萬頃麥秋晚
一莖雙秀實且多唐叔同穎差可擬張堪兩岐奚啻過
僉曰物瑞乃嘉穀連理之木空婆娑衢填巷塞獻所有
公堂拜舞紛童皤年荒政煩民困極賴我邦侯勤撫摩
我侯莫夜門如水我侯清靜庭張羅往時誅求盡報罷
吏胥無復相撓訶男安耕作女安室雞豚滿柵牛滿坡
天將休祥表異蹟感應之理真無頗侯曰吁嗟我常職

馨香感神皆帝力夢陽曰大作時調

撚鬚亭爲劉希載賦

撚鬚亭上客吟哦苦吟不了如鬚何嘲風詠月暮復旦
一吟一撚將無多神遊象外坐無語仰面不避王公訶
吾聞風雅適情性枯腸無乃窮搜羅君不見唐家杜陵
死狗癖飯顆甘受詩仙呵后山閉門亦何事擁被呻吟
如抱疴亭前物色清如許鬚固可斷心不磨君看于思
能百戰爲語山谷休橫戈

觀復齋

一陽地下已胚胎七日驚聞夜半雷亡疾自應知道長

成功端合待明來千門萬戶扁方啓元酒希聲氣始回
識得天心無改處真元須向此中培

送胡邦治司訓之任

桂殿龍門信已虛廣文辛苦一瓊餘官同泮水歌新什
坐擁臯比講舊書黃葉風高人去後碧天霜冷鴈來初
猶懷四十年前事青眼相看白髮疎

與郭于蕃話別二首

相畱無計又西東俯仰茫然感慨中往事君應忘塞馬
宦情吾已付冥鴻平生口過心無怵老去官貧道未窮
早寄平安三五字莫將懷抱逐秋蓬

猶記門牆問業辰一時桃李羨青春名成進士還高價
官到中臺亦要津逸足康莊翻窘涉畏途風雨正愁人
眼前故舊應全少把酒臨歧莫厭頻

送段惟勤僉憲之福建

早從霄漢羨蜚英爲別年多老更成聲價文章還政事
官曹錢穀又刑名繡衣持節宣威去翠幟生風問俗行
江國地連閩粵近口碑須聽說澄清

把酒江干話別難秋風驛路早生寒朝廷新定分臺制
綱紀全資執法官面帶冰霜消瘴癘政覃膏雨起凋殘
莆田邵武巡行地好爲蒼生問謝安

林待用朱懋恭○
夢陽曰堂堂

題畫三絕句

漫道春遊好遊秋更可人青山紅樹底別是一風神
晴雨尋常事何須婦作讎世間翻覆者如爾媿雖鳩
二月舊絲盡時哉萬類新天機自潑潑猶有不蠶人

十月十八日邊汝成歸自京師晚過予予衰病久
廢筆硯空谷足音不覺自喜呼酒賦詩用寫懷抱

吾子北歸朝候我衰翁病起強開尊蕭蕭霜葉秋猶在
滾滾風江浪正奔骨肉交親今更幾壘鹽心事老須存
錢塘只隔孤帆外兩地相思一夢魂

夢陽曰
好篇

春風京國後堂深希大周旋更汝成已覺頭顱非夙昔

在淵詩金卷之五
七
祇將肝膽見平生橫金曳紫沾恩日茹藥餐冰作宦情
勳業無成吾老矣幸因諸子托時名

汝成夜話邃菴

昔行殘暑後今歸小春餘俛仰節序變感之增煩紆平
生道誼交落落晨星疎別易會却難王事多馳驅自從
別子來短髮不盈梳耳重不聞琴眼昏兼廢書豈徒原
憲病亦有杞人愚不逢同心人何以慰索居燒燈坐終
夕至論良起予翩然舍我去佇立空踟躕非無百尺繩
難以縮征車子才本利器盤錯憑解紆子心一衡鑑應
物無差殊悠悠萬里途勛哉慎所如

出西郊山行

石淙水清淺一葦不可航大峴山逶迤纍纍青石岡晨
興肅征夫與子同徜徉山行多戒心茲遊幸俱忘不須
畏豺虎豺虎避神羊不須畏荆棘拉朽隨干將平生千
萬歧涉歷如周行我老已息游子志方奮揚健哉圖南
翮高舉凌扶桑

夢陽曰志堅如石氣屹如城

茲晨大霧比山行豁然開霽戲作一首

宿霧濛濛帶雨纖朔風吹釀曉寒尖青山要識詩人面
百丈丹梯一捲簾

汝成謁先隴志感

淚痕和露灑楸梧渺渺長空鴈影孤應是通家還骨肉

三年兩度奠生芻夢陽曰此篇情勝

口占漫談四首

歸鴈初從北官舟亦復南風塵嗟滿眼何處歇征驂夢陽

曰是唐人句

皇華拜家慶樂極倚門情如聞雙病眼已復舊時明汝成

母夫人曰盲且十年至是復明

問訊西涯老君言實慰予雲林隔朝市不敢致興居

一月京華任相過但白巖雞壇今下馬應記小時談夢陽

曰唐人句

汝成過丁卯橋石淙精舍有作次韻

往事空驚歲月忙，浪誇泉石有雲莊。
力微已謝千鈞重，道大難窺一隙光。
每向星辰瞻魏闕，直從夢寐接羲皇。
山中習靜今成癖，猶厭風來水作淙。

夢陽曰此結可與靜者道

汝成偕諸友遊焦山

老夫平生好山水，十年車馬泥塗裏。
歸來幸免纓紱累，布襪青鞋從此始。
曉聞騎馬去看山，多病相違吾負子。
石公渡口一風帆，三詔洞前雙屐齒。
瘞鶴舊銘多漫滅，十數字存而已矣。
定知崖石有新題，合與山靈先志喜。
因思漢朝重風節，束帛安車猶不起。
紛紛塵網誰能逃。

空羨巢由能洗耳君看脉脉山中泉依舊流行還坎止

夢陽曰
大作

席上漫興

予憂病之餘聰明不逮偶因汝成觸我高興強
措痛眼伸紙疾書醜惡可厭同心之言或者不
在字畫間亦竊附古人贈處之義云耳

弱背偏宜煖日烘小春天氣入初冬露花霜葉依稀盡
不隔青山秀色重

甯惟臣話舊有作

京華抗師席英俊紛追隨於時雲路中後先爭奮飛文

章華館閣論諫光瑣闈聯班布臺省各各能自持荏苒
三十年大半金與緋建立有大小一節無瑕疵得喪不
皆齊貴此名譽垂君居諸子中灑然絕塵姿敬皇樂從
諫封事多匡時曾毀延齡麻不受若訥嗤東藩具瞻地
早被朝堂推霜蹄忽以蹶三年滯離司舊物始光復新
問隨颺馳我豈河汾儔敢稱房魏師姓名幸有托聊以
慰衰遲一燈話疇昔離緒千縷絲眷言平生交對酒安
可辭出門冰雪厲萬物斂華滋灰葭動律管陽回無愆
期晚節益自珍持滿須惕而皜皜白苧裳勿使緇塵緇
詩成寄同志庶以存箴規

夢陽曰
唐句

惟臣初與喬希大諸生游予門同遊者皆一時名士後先登進士第者四十餘人得省元者三人得會元狀元探花者各一人三十年來升沉得喪不皆齊皆能慎自樹立今在仕途爲侍郎者三人爲太僕卿爲少卿爲翰林學士爲行太僕卿少卿爲按察使者各一人爲鴻臚卿爲叅政爲按察司副使者各二人爲叅議知府者各四人其分臺南北布列郎署出爲府佐州縣正者尙多所進殆未可量惟臣在諫垣獻納糾彈茂著風采遷山東左叅政尋以無妄左調者久之今年乃自兩浙運使復

遷山東叅政大拜蓋從此始矣予病廢無補慙負
國恩徒恃諸門生托名不朽故於惟臣之會夜話
及此漫錄爲贈箴規期待之意於是乎存非以師
道自居且銜也別有近體二章續書於后

舊銜重領渥恩新未老平生報國身世味辛甘嘗已熟

路頭夷險認方真看君可是愚如甯

夢陽曰以甯比顧甯奇之又奇

我曾同困在陳

予憂患中惟臣所助爲多

堂下小梅初蓓蕾相思應

寄一枝春

夢陽曰

別久相逢強盡歡幽懷欲叙苦多端齊民喜訝舊叅牧
士論猶傳名諫官冰雪正深君又去陽春欲轉歲將闌

石梁詩金 卷之五

政成他日畱遺愛應向甘棠頌裏看

夢陽曰
堂堂

百鳥朝鳳歌

乾坤大化何氤氳至和所鍾方出羣古稱四靈王者瑞
羽蟲三百六十鳳凰為之君崑崙之陽丹山穴有鳥有
鳥文五色威儀何止稱九苞體質分明全七德夕飲底
柱湍朝餐琅玕石和聲隨祥風異彩絢朝日覽德知時
從去來不信人間有矰弋昔在軒轅天下治安乃巢阿
閣乃止東園衆鳥從之翩翩別如睢鳩序鴻鴈潔
者鶴鷺文者鴛華蟲孔雀各競彩鸚鵡鸚鵡紛能言奇
毛怪羽瑣瑣不足數聳身注目俯仰萬態一一相向隨

騰騫帝曰噫嘻此何祥乃召天老求其端候聲調管和
律呂象形設色爲衣冠金天繼至以瑞紀官虞儀簫韶
周鳴岐山從此寥寥千百載王者不興靈瑞慳神雀丹
鳳虛紀號謬指野鳥呼鳳鸞遂令百禽失附麗空向朝
陽矜羽翰梟雄鷲猛各扇毒弱肉殘食翻相殘吁嗟乎
萬水朝東衆星拱北此道天人同一格當今聖皇御宸
極一統華夷歸帝德鳳兮鳳兮胡不來看畫題詩三嘆
息

因益之得東山翁消息用韻二首
吟翁錄寄益之
閒覽不必寄翁

慷慨西行未死年敢將心事問蒼天忠能結主非孤立
計不謀身見獨賢塞馬寒嘶青海月胡笳悲咽玉門烟
江雲迢遞飛鴻盡那得音書到九泉

牢落窮邊定幾年黃塵際海草連天心如鐵石寧甘死
名在華夷共識賢戰後沙場枯有骨夜深陰火黯無烟
殊方不是淹畱地衡楚山川望早旋

張五老壽圖

夢陽曰二篇亦堂堂正氣

畱侯孫子生盛時酡顏紺髮雙黃眉錦堂春酒照春色
人間豈復殊瑤池堂前寶樹光風滿堂後春陰初日遲
霓裳羽衣且莫論請看翩翩戲綵兒玉桃花開金母宅

仙翁食桃去其核核多直與崑崙齊笑指滄瀛化卷石
彩雲堆中三老圖相逢似語天地初青松古作丈人行
曰鶴下應山童呼神仙渺茫不可問此翁此壽今所無
夢陽曰灑然之篇

遊金山三首

坐上青蒼接森漫樓臺面面枕高寒八牕帆影隨潮過
兩岸人家隔水看江有名山成偉觀天將底柱障狂瀾
塵心到此消應盡更欲臨風漱碧湍

東望海門連北固渡江形勝更無前且拋盃酒尋常債
來試中冷第一泉雲破遠峰天際出月明高閣鏡中懸

時清不作乘桴計聊向松蘿臥晚烟

雷雲亭上立多時古木滄波繫遠思南北界分還此水

孫張題後豈無詩風高鶻嶺驚秋早江轉龍門到海遲

三十年餘塵夢裏每因登眺覺吾衰

夢陽曰三篇亦復堂堂

送石樓李叔淵遷少宰還朝

皎皎清冰映玉壺向來風采動雷都風霜滿面炎蒸避

甘雨隨車槁朽蘇聖代弓旌看漸廣中原麟鳳未應無

憑君寄謝西涯老士氣須煩赤手扶

夢陽曰平正

石樓公之別予既贈詩公席上以岑參早朝詩韻

索賦遂得二章併錄識意

別來長恐舊盟寒相見無言酒亦闌
宋璟陽春真有脚萊公門地似無官
青驄按部名猶在紫鳳啣書墨未乾
世路艱虞應飽涉李膺元自不辭難

江南細雨杏花寒又見春光一度闌
力振臺綱前御史政扶元化古天官
相逢話舊盃猶淺遇景畱題硯不乾
莫怪臨歧成繾綣老來偏覺別離難

勝

夢陽曰二篇語意俱稱非石樓所能

奉陪石樓吏部李公遊焦山口占一首
席上限韻得四首併錄求教

勝概東南幾擅雄此山屹立大江中
君來價重韓吏部

我老才非蘇長公且向川流觀道體要從瀾倒識神功

輕舟便合隨風去海上蓬萊咫尺通

夢陽曰用事如囊中探物

歷盡丹梯更上臺病餘雙眼為君開沙頭幽鳥自出沒

洞口白雲時往來江海未忘憂國念風波應仗濟川才

相逢此地真非偶何惜花前爛漫盃

夢陽曰胸中有此景筆端始有此景

浮玉有山真勝絕每因風景費攀躋磯頭白石添新水

雲裏蒼崖認舊題入海潮聲還旦暮過牆帆影自東西

金鼇玉帶真誰事欲為山靈暫乞犀

夢陽曰好聯讀之眼中真如見之

三詔當年下漢京不將高隱博浮榮地奔龍躍此巖在

浪打雲霾稀客行石壁凝烟苔色重海門浴日霞光明

茲遊奇絕人間少，悔却前時不出城。

清風直與富春長，江水悠悠樹色蒼。
秩祀載嚴周典禮，遺編猶紀漢文章。
松聲暮逐霄濤急，花氣晴薰梵語香。
却恨高人少幽躅，漫將好景屬空王。

夢陽曰五首並皆佳妙

奉陪少宰石樓李公遊焦山餘興得長句兼以贈

別

金山之東復焦山，兩柱屹立洪流間。
石樓先生好奇者，公暇拉我同躋攀。
江波不動平於掌，鼇背穩踏心神閒。
想當造物開混沌，鬼斧爲鑿蛟龍關。
至今嵯峩鎮南極，吐納江海迴狂瀾。
靈根不畏滔天沒，直與元氣相爲端。

焦光托名亦幸爾何物浮屠能踞蟠與君尋幽兼弔古
櫟磴厯厯披榛營龍叟生孫青玉塢仙翁遺世桃花灣
華陽真逸有舊刻名不可滅字已剝病起曾遊半山止
兩眼生花腰脚頑君年稍長體力健直上如挾雙飛翰
兒童攙扶強追逐吸江亭前成大觀仰窺空無俯渤澥
京口諸山如彈丸倦來下顛水晶菴旋烹竹筍澆沉檀
白雲自封三詔洞亂石齒齒苔痕斑帆檣如林出屋外
鼓棹放歌時往還酒酣閒行繞山脚稻田旆旆魚班班
古今解道惟蘇子而我舊遊徒汗漫君如朝宗意先往
我獨佇立畱應難海日堂深白雲晚輕風吹面生微寒

揮毫賦詩兼贈別留向他時作畫看

夢陽曰大作

重遊甘露寺

地迴樓臺出半空固知開鑿自鴻濛望窮江海朝宗處
身在鳶魚俯仰中僧定不知兜率雨我來偏得舞雩風
祝融莫謾憎多景至巧終難奪化工

多景樓屢經回祿
○夢陽曰風中之

雲變化
誰測

已辦登臨罷遠遊倦知吾土故多幽渡江形勝諸山小
到海風烟一日收晴影危樓僧寺午寒聲飛雨釣巖秋
滄波滾滾何時定贏得丹心伴白頭

夢陽曰萬事如浮雲過前定之又定

堅之
復堅

林... 諸... 鐘... 符... 之... 五...

弔竹逸竹翁

隔歲生芻奠始成到門魚鳥亦含情
長江自繞圖山麓
故里猶存竹逸名翁
畫堂惟正
來風日正秋晴
最憐感帳揮觴處允聖堂筵鼓吹



石淙詩鈔卷六

明安寧楊一清應靈著

門人

北地李夢陽

武功康

海

編輯

正德戊辰四月二十三日

詔獄至揚州有作

才薄官高負若難罪甘縲絏示南冠飽經世路危何害

紙檢平生死亦安行乎共憐雙鬢日老天應鑿寸心丹

向來憂病軀全瘦猶自微吟詠進客

宿徐州

三日彭城夜不眠愁懷真以日為年因將舊事從頭記

石渠言金卷六
只恐中心或愧天

警柝聲嚴院鑰深一燈無語夜沈沈多情合是窗前月
照見平生鐵石心

雨意冥濛有却無麥苗蔽野未全枯龍宮若借天瓢水
頓使彫傷一夜蘇

時方苦旱

見新月

木枯不離手愁添霜髣毛皇仁原不隔臣罪本難逃少
小承恩日平生體國勞長空有新月萬里燭秋毫

登舟三首

南冠隨駕使舍陸還登舟長河下通海日夕無停流北

望帝都邇使者心休休顧我獨悽惻圍屏念幽囚此身
懼不免而暇爲官謀平生不灑淚那更攢眉頭使者勸
予酒病飲不滿甌倚篷聊復歌庶以寫我憂

少年清忠願垂老盟肺肝悠悠三十載行路誰知難奪
我鳳凰池置之戎馬間仗鉞走強虜龍沙浩漫漫日月
豈不光江海豈不寬稅駕行有期俛仰復何言

腐儒愧遭逢兩年三命新耿耿方寸心誓委七尺身東
巡起彫瘵西征障風塵奮劍當城狐遑恤流俗嗔營營
彼何爲巧言方亂真不疑本無兄參乎非殺人吠聲亦
常態安用此云云天定會須勝君王自明仁

五月十二日入京師時已得旨羈候在外病中言

懷絕句十首

赫赫章條詔獄時
白頭鄉井已無期
天恩近許寬縲紲
痛定翻成數日悲

臥病頽然不出門
幾因風雨欲消魂
故人相見多相慰
猶幸君能七尺存

青天極目浩漫漫
高鳥晴雲意自閒
回首關山戎馬地
丹心贏得鬢毛斑

客至從嗔不下樓
兩年多病罷梳頭
消愁謾道杯中物
縱飲無過數酌休

溽暑中人如中酒白日饒睡昏昏然江鄉水竹渺何處
脫屣未能情自牽

天近從知易得春病中情思夢中身連章莫道承恩晚
猶有圓屏未脫人

生平直道任人嗤自倚青天白日知不是流言眞可畏
祇緣才薄負明時

白髮年來白已多愁添新白欲如何笑知人事天時在
一曲臨風浩浩歌

藥裏關心夢不成午時起坐自天明門生故吏時常過
誰說青山也世情

天地茫茫氣一丸
浮生消得幾悲歡
要知消息盈虛意
半夜呼燈借易看

晚蠅雜蚊而飛

白羽風多不住揮
晝蠅狂帶夜蚊飛
病來血肉無多在
何物營營未息機

有以賜枇杷分饋奉謝

翠籠分來數顆黃
嚼餘風味齒生香
多情似解相如渴
賜得金莖許共嘗

苦熱三首

傲居得西樓
西日偏相照
忍狂不敢發
科頭但微嘯

大塊一洪爐熱氣如蒸海清風招不來道上無冰買
冽彼中泠泉悠然妙高臺美人在天南我將歸去來

六月初九日得旨致仕志感二首

病來真得謝塵羈又聽天書降紫泥罪大已拚身似葉
恩深還許帶橫犀便呼童子成春服自課園丁灌夏畦
猶有誇張隣叟處故山樵徑未全逃

千鈞擔重本難任共道皇恩與海深榻枕山雲眠較穩
酒邀江月醉還斟行藏往聖遺編夢消息青天萬古心
閉戶著書吾願足舊游休更費招尋

高希大所藏沈石田山水圖卷

石田真豪不受呼醉裂生綾爲此圖圖成咫尺若千里
浮雲瀕洞山模糊松蟠老枝半隱見路繞深巖時有無
世間此境定何所不是洞庭還太湖已無幽人結廬舍
肯放漁父容舳艫他山凡鳥不得入況有杖履隨泥途
一翁居中坐盤辟掃石獨引雙僮奴方今太平非避世
有道或是神仙徒琪花瑤草亦無數三秀之芝九節蒲
清寒逼人絕炎暑白羽雖輕安用乎此圖設色趙千里
坡樹依稀宋承旨石田法自董巨傳細觀經營無乃是
由來看畫不必工俗夫指點求形似春蠶見物繭卽成
意到揮毫斯妙矣白巖好奇世無前踏徧并晉還幽燕

觀河不避禹門險望嶽直上西峰巔壯懷磊落不自制
尙欠江南山水緣明年預買三吳棹同向洞庭尋石田
畫中仙翁倘可見與子細問南華篇

姚定之園池聯句

憂病之餘久謝筆硯若游賞吟諷之樂固有不可
暇及者比緣公事來京師事竣將歸江南假宿
城東姚君定之園第凡十餘日花木陰蔚清興
灑然時方酷暑炎蒸爲之頓失有池可長數十
丈蓮花盛開芳敷爛然僉謂都下奇觀無以逾
此太常少卿喬希大嘗夜陪茶話月中因與散

步水竹中登臺眺望塵慮盡忘予觸興成句希
大續之共得八首畱之主人他日能言君子必
有屬和之者

月底雲林一望中楊池邊香霧隔冥濛高臺地絕人間

暑宇幽鳥聲迴柳外風茗椀愛嘗新摘菓楊蓮盃酣挹

旋分筩詠歸沂水真多興宇頗恨塵踪太劇匆楊

出郊風景暮聞蟬楊野意新涼共豁然空翠暗霑衣袂

濕宇紆迴輕與布鞋便南州愛客真懸榻楊東洛看花

動隔年始信山林在城市宇漫誇陸地有行仙楊

多緣共坐錦雲渠楊此興濂溪或未如歌聽采蓮香在

掬宇醉憐擎蓋碧初舒藕缸下覓雲根潤楊魚笱深看

竦影虛還憶華山登賞地宇好詩曾向絕巖書楊

白羽涼添樹底風楊清寒疑到水晶宮鐘聲暗度西林

寺宇花影宵移別院權雞犬隔隣猶近郭楊兒孫繞膝

已成翁吳門別業依稀似宇却恐并州是夢中楊

隔苑涼聲送轆轤楊青青還詠水中蒲香風緩逐緣溪

步宇細語低聞對岸呼不遣蒼苔封白石楊漸看明月

上高梧乾坤樂事知應少宇已覺茲游興不孤楊

嘉樹垂垂綠滿堂楊坐來涼露濕衣裳炎蒸似與京塵

隔宇歲月空隨宦海忙花氣入簾香百和楊雲陰匝地

幙重_宇追趨獨有從師樂_宇聊復高歌一舉觴_楊

久因多病罷幽尋_楊暫假旌旄憩竹林入座蟬聲來樹

杪_宇隔簾人語在花陰習池慣引山公醉_楊韋曲新煩

杜老吟祇少終南對庭戶_宇已勝塵土浣冠簪_楊

吟對池頭十丈紅_楊宛如湘浦挹秋風僂姿淨染霓裳

濕_宇羽蓋香隨玉柄通都下奇觀今見此_楊人間名卉

更誰同臨流欲和芙蓉曲_宇復恐花神解惱公_楊

宿杭氏草堂閱莊定山詩次韻二首

遠游心事已粗償却怪身非舊日彊塵夢覺來猶未覺

人生狂得且須狂門前五柳無彭澤天下名花有洛陽

會得一元消息意笑看浮世幾閒忙

詩債文逋各自償流年何用問衰彊自家芳草濂溪意
吾道春風點也狂嘉樹四時圍秀色短筇終日坐斜陽
秋園無限閑花在喚道游蜂故故忙

夏太常竹石爲湘南易坤賦

白髮當朝老太常酒酣身帶墨花香祇今素壁看疎影
風雨蕭蕭忽滿堂

簌竹分明石丈隨楚雲湘水夢中疑鄉心尙隔紅塵路
長對楚人歌竹枝

晚逸堂爲杭守之賦六首

新堂高枕潞河流偶脫樊籠此繫舟林密不知三伏暑
雨深還是一番秋客來載酒尋芳草興到裁詩謝白鷗
我有園居未成逸每因風景却生愁

夢覺迷途歲月長老將生計托耕桑祇憎飛絮撩人白
更怕鳴蟬聒耳忙山色望連庭樹碧秋風吹盡稻花香
及時不樂真何待況復佳兒是肯堂

小徑升堂自掩扉手栽槐柳近成圍如君晚逸真堪逸
老我懷歸始得歸看竹已忘身是客采蓮聊製芰爲衣
秋風關塞雲鴻盡吟倚危欄送落暉

閒聽漁歌坐釣磯半生心賞未全違花深風雨春堪惜

鶴拂烟霄倦却歸靜裏乾坤吾與爾夢中蕉鹿是還非
秋來若問田家樂白酒新芻蟹正肥

閉門卻掃柰閒何半百朱顏未肯酡聊可優游惟局戲
最難驅遣是詩魔谷雲溪鳥同盟在水色山光引興多
密樹繁陰坐終日可容飛入一塵麼

坐臨流水聽潺湲目共孤雲自往還萬事不如歸去樂
千金難博老來閒故家書卷床應滿少日詩題手自刪
惟有舊游多過客柴門雖設未容關

挽杭處士

二十年前德愛深重來無地可追尋題詩不盡通家意

祭酒初酬挂劍心客死有靈懷返骨含生垂涕說遺金
君看身後多堂構已有聲名滿士林

遣興二首

野店鐘聲到枕遲無端鄉思入支頤大觀天地聊行樂
獨立蒼茫自詠詩多病兩年妨酒醜白頭雙眼亂花枝
江湖不隔還家路坐倚孤篷任所之

病憶三南夢裏家萍踪何地不年華愁懷對酒偏成醉
老眼逢秋易著花未了真禪猶色相祇應高臥是烟霞
謀生自笑機心拙也向青門學種瓜

居靜軒

茫茫誰是百年身
渺渺烟波泥殺人
便向靜中尋至樂
還於定後識吾身
風清月白虛堂夜
雲影天光活水春
此意分明如會得
任從心上起經綸

題畫扇寄贈段德光檢討

塞鴈來還去
吾生亦倦游
風塵雙短鬢
江海一歸舟
山雨茅亭暮
烟波澤國秋
詩成不相見
聊得慰離憂

偶吟

昨日姚家池
今日杭家園
茲行亦多幸
兩逢東道賢
城中看榴花
城外看荷花
榴花開正好
荷花開較早
看花隨處莫
教違恐因風
露惜芳菲待
到家山開口
日菊花

須插滿頭歸

聞鳩

昨日晴今日雨耳聽林鳩向農語有酒莫便頻沽沽一
熟科徭償幾許昨日雨今日晴老鳩隔林猶一鳴沽沽
莫道酒錢少頃刻陰晴如世情

直沽

直沽重過日風景異當年舊署無兵備新衙有海鮮塵
閒商賈市關問往來船惟是滄波月清光尙宛然

蔡村夜值風雨

顛風夜逐溪雲行急雨作吼如雷鳴穩送祝融差可喜

橫欺河伯難爲平黯黯長空昏海氣蕭蕭山寺咽鐘聲
樹蟬不號臯鶴避在物且爾嗟人情沙衝石走岸欲側
林葉捲落紛縱橫孤舟舂撞不得定夢裏波撼滄江城
篷穿木罅舟爲漏初猶點滴俄如傾衣裳淋漓燈火滅
裹頭寂坐神魂驚潞河登舟正澄霽一日變態須臾生
欲呼雨師訟風伯獨遣憂苦來相嬰平生矢志不愧忤
末路豈更占陰晴杜陵廣廈念未了唐介風波身已輕
蒼天無言風雨歇起看河漢疎星明

書夢

生來無計荅乾坤一飯從知是帝恩怪底夜舟眠不穩

夢中猶自叩天闈

瀛海道中雜作四首

北闕戀宸居西風悵別餘樹烟山色盡舡月海聲初往
事十年夢鄉心一紙書歲華空復暮猶自病相如
潦倒思鄉客遲徊遡浪舟樹運雲外寺城帶海邊樓病
濕偏愁兩年衰不奈秋偶然談世事猶動廟堂憂
天空秋有籟海近夜通潮獨樹如相待羣鷗不受招貧
餘詩券在愁仗酒兵消何用談生計故山隨老樵
四顧天無際歸心正渺茫秋風動禾黍落日下牛羊野
寺苔生院人家茅覆墻衣巾半沾濕知在水雲鄉

自述

曾草封章達九天一官尸素恐妨賢由來心事本如此
祇是當時已惘然白首放歌無舊侶青山相對有新篇
滄浪濯罷歸來晚一棹西風萬樹蟬

誰放昏花阿堵中向來岐路錯西東萬峰明月隨孤榻
千里長河過幾鴻老去悲秋猶作客愁來衰鬢早成翁
翻思朝省沾恩日欲報涓埃未有功

阻風二絕

三日舟行剛百里昨朝風雨不曾開舡頭一夜高於岸
知是上河新水來

船頭飄葉掃成堆把酒推篷日幾迴猶勝蔡村村下泊
一燈風雨夜深來

有所見

沙頭候吏聽雄呼兩兩樓船動百夫便合停舟相遜避
料應多是執金吾

武城縣

當日絃歌說武城停舟猶聽讀書聲聖朝文教非前代
小邑寧教獨擅名

作詩三絕句

久因案牘廢詩篇客路風花倍自憐老去縱餘精力在

也應不似十年前

偶然得句自家知
人道今詩勝舊詩
莫笑撚鬚成底事
也勝蝸化戀枯棋

清忠亦是當年願
道德全違末路心
猶有未忘情處在
及時開口或微吟

舊扇二首

千年用舍一行藏
此道分明白日光
不是秋風多棄物
人心元自有炎涼

當年酷暑藉仁風
春意都歸掌握中
骨力暗衰顏面皺
祇留清白舊時同

納涼

倦倚舳窗首重回一襟聊爲納涼開月中樹影臨流見
天際秋聲帶雨來宋玉有悲空作賦杜陵多病獨登臺
無端又是尋詩地鳥度雲移落酒杯

一笑

落落長風捲岸沙倦餘行子合歸家訛言正愁市上虎
酒影一笑盃中蛇曳杖閑行隨野鹿看兒默坐數棲鴉
向來寵辱休重問只此優游度歲華

閱陳簡齋詩集

詩到晚唐人已厭末流誰遣又西崑簡齋故出坡翁派

蹊徑眞趨老杜門
廟瑟尙餘高雅調
天機全謝剪裁痕
君看香色如花喻
不是須溪未易論

嘲舟子

南歸過洪當順流
南風放顛逆我舟
水流雖順風却逆
拍岸難施篙櫓力
舟人機變倉卒生
扯篷逆走還橫行
篷張離岸趁流急
一日猶可半日程
舟尾居前首顧後
顛倒無乃非人情
怒呼舟人順我舟
風不我順盍少畱

直河

直河之水直如弦
亦復千年在道邊
縱使封侯眞可信
不將一曲受人憐

舟中感興十首

澹澹微雲度悠悠孤鳥還莽莽尊前事番番衰後顏平生曠達懷誤落塵網間迷途非遠而已破夢覺關所以慰我情賴此江上山有口費吟哦有足窮躋攀行哉勿復疑一笑發天慳

繫舟蔭高樹挂席揚天風夕照變岩姿白雲行水中塵慮忽以忘豁然心境融緬懷十年前何事不匆匆倚仗看牛斗銀河麗層空扶桑豈無路清淺元相通晞髮吾所願至人苦難逢

歸鴻作意號風露淒以秋所憂在矰弋而豈稻梁謀萬

族各有托吾生本如浮雲山莽蒼蒼世事劇悠悠

諏詢徧關中經畧窮西夏平生所交游期軼韓范駕抱
病復遭讒薄命委飄瓦涸餘西江鮒瘦比東郊馬稽首
戴君恩明明肆天赦此身倘可報不惜膏草野

落葉下空山秋意始蕭爽長河四十聞舟航日來往兩
洪石峻嶒劔戟森相向魚龍獍欲鬪性命寄篙槳搖搖
蕩風波兀兀話疇曩誰知至險巖乃在人心上四顧忽
忘言松露滴清響

貧來學賦詩五言不充腹悶來與客奕對局花滿目亦
知天地間二者俱不俗此復不自能大笑立於獨何如

付盃酒一醉萬事足酒醒坐披襟有書尚可讀心懸百
尺樓夢脫五斗粟夕霞誠亦佳可翫不可掬聊將無絃
琴靜和淵明曲

舟行及秋霽秋色明葦葭天高柁樓淺日落帆影斜故
鄉在目中澄江淨鷗沙愧非能賦才有句不足誇暮聽
金山潮朝滄北固霞持此不啻足悠悠送年華衆手劇
雲雨長途多覆車泯泯復波波浮生當奈何

向來年紀到胡不早休官人知進非易豈信退亦難先
皇天地恩有命重於山連章疏懇悃時荷溫語頒觀兵
虎貌壯揮劍霜雪寒臣身不自惜恃此方寸丹多病違

成功讒言豈無端鼎湖望莫及血淚空洄瀾

宋朝西事興廷議仗數公三策戰守和持論各不同韓
公初三戰提旅當賊鋒至今好水川流血餘腥風范公
圖經畧志守不志攻雕陰扼其吭靈武城其雄大順屹
有築清澗引而通雖無賊俘獻已遏賊馬衝終教賊膝
屈西顧聊從容臣本鉛槧儒豈不念除克功成枯萬骨
生意隨秋蓬而況兵家事勝敗誰能窮設險有明訓著
之易象中沙場四百里深塹連高墉一勞還永佚誓以
輸愚忠云胡曉曉者計不究初終凡民勿復道任耳紛
章縫茲事信有數不繫臧倉逢作詩俟君子庶幾希後

功

微風動蘋花落日照野棠鄉心信歸帆溪草亦自芳江
南水竹居待我幾星霜昨歸不出戶今歸不下堂平生
性倔强與世爲低昂擲揄豈足異真樂吾未央月明楊
柳疎露下芙蓉涼聞道嗟已晚眷言惜流光

六言二首

去日祝融行地來時少昊司天不知幾番花落但見三
回月圓

南風北風時節上水下水孤舟天公自有成算人生何
必安流

和喬希大贈歐陽國占詩韻

高雲隨鴈度長江豪氣猶橫寶劍雙誰有心情關骨肉
早知憂樂繫家邦香消簾幙風回座秋滿梧桐月在窗
漫向舊游談往事久因多病謝春缸有身自分千金許
何力能任九鼎扛半載羈懷緣我苦一時士類爲君降
才名抱玉空勞獻詩興懸鐘不受撞夢覺孤舟相憶在
水聲到枕正淙淙

和喬本大贈歐陽國占詩韻

江南花竹盛郊居江上烟波接太虛義氣壯隨行處路
遠懷愁托寄回書隔年節序還三易一日顰眉定幾舒

燈火同門多舊侶衣冠傾蓋總高車
共憐貌比來時瘦稍喜憂從險後祛
滿耳秋風歌白苧半空涼露浥紅蕖
簷花坐落挑燈夜玉麈談生對客餘
苦向冰霜驅僕馬不辭塵土浣襟裾
家聲永叔元無忝烈士虞卿恐未如
心切望雲兼愛日夢懸竹笋更江魚
碧連蔓草孤帆外響落高梧一葉初
欲向茅峰結真隱煩君先爲葺吾廬

秋興八首

世事經心白晝眠天涯風物轉淒然
山鐘暝度長林月沙鴈寒迷蔓草烟
畫閣人翻傷別調白蘋洲繫采芳舡
江南塞北無窮意過眼流光又一年

思鄉懷古正難任又聽高城急暮砧青嶂兩餘秋色迴
碧天露重月華深陶潛五柳終成隱杜甫孤舟一繫心
應是眼前同調少病來三月不聞琴

年年秋色鼓笳中王事匆匆歎匪躬玉帳論兵纔北鄙
金牌宣勅又西戎孤城畫角催殘照萬里黃雲沒斷鴻
回首江湖天漠漠荻花深處一漁翁

辛苦平生數卷書十年多事幾舟車夢懸魚鳥忘機處
身是風波利涉餘生入玉門真幸爾老思葦菜且歸與
捲茅昨夜風還雨破屋關情是舊廬

莫漫逢秋浪自悲秋來風日總宜詩客中對菊猶貪采

病裏慵冠不怕欹心愛碧山還舊隱遠看疎竹更新枝
芙蓉江上憑誰問搔首無言憶所知

夜雨芭蕉思欲逃白頭吟嘯失羈棲翻愁舊路多荆棘
稍喜邊聲罷鼓鼙露下金盤天宇靜月明珠樹斗星低
舡頭把酒悠然坐喔喔前村又曉雞

倚棹江天百感生倦扶筇竹且閒行蕭蕭紅葉夕陽下
冉冉白鷗秋水明飲量暗隨詩力退路缺真向老懷平
蒼蠅不省寒將至何處飛來漫作聲

短篷聊繫白蘋洲一夜寒生萬樹秋塞北風回蘇武鴈
江南月滿謝公樓金尊綠酒邀同賞青海黃沙憶壯游

問道病來眠食減詩成還似舊時不

秋夜

耳熱不成寐臥聞長短更推篷水氣入舉眼白雲生芳
草當年夢歸鴻此夜情蕭蕭幾林葉畱取寄秋聲

渡淮二首

孤舟醒短夢起聽棹歌聲淮海天無際魚龍夜不驚客
懷散煩鬱獨坐念平生南風尙作惡未敢計歸程
舡窗報夕霽月映清淮流風定舟帆穩天空沙嶼浮烟
霞自多態鳩鴈亦知秋足可供怡悅從今罷遠游

題扇面小畫次韻

石澗詩集卷六
遠看飛鳥盡心逐去舟遙莫話紅塵事雲林遠市朝
歸帆信剛風千里不知遙回舟泊烟渚有夢入中朝

秋興

漠漠歸雲起亂愁思鄉何處仲宣樓關山千里歲月晚
風雨一番天地秋異國烟花驚觸目老年身世入搔頭
滄波落木無窮思慙負平生汗漫游

露下空江白鴈新天涯常是未歸身形容老矣頻看鏡
世事茫然一岸巾知己漸看朋輩少客懷真向僕奴親
閒愁賴有詩消得復恐詩魔解惱人

渡江二十首

心驚詔獄眼添昏
完壁歸來是帝恩
不用臨風傷往事
餘生何以答乾坤

濃花萬點麗神州
翻遣茲行作勝游
歸到故鄉看物色
青山依舊枕江流

隔江遙望一舸開
人道病夫歸去來
却媿壯年雙健脚
不衝風雨卽塵埃

風塵冉冉路漫漫
一笑渡江天地寬
合遣蒼頭持短刺
遍投親友說平安

黃塵脫屣一身輕
十載無功恥聖明
獨立江風吹短髮
渚雲汀草各關情

江頭如聽可人招
鼓柁放歌歌沈寥
秋色滿船月皎皎
水聲八樹風蕭蕭

江雲有意護歸舟
影落孤帆故故浮
何不從龍早爲雨
侶聞禾稼已無秋

歸鴻江上兩三聲
白露洗空河漢明
回首天南望天北
老臣憂樂未忘情

時清不著管寧帽
暑退懶持袁紹杯
三徑菊松故無恙
年年相對好懷開

世故撩人西復東
園花開遍幾番紅
從今老子都無事
江上尋詩滿袖風

五十五年知昨非北山心事悵多違
自慚不及沙頭鳥
春去秋來舊處飛

手提文柄復兵權說著平生一莞然
老去不尋方外事
睡烟歌月是餘年

潤州江山天下稀老我何事不懷歸
金焦八望忽色喜
愧有新詩能發揮

只合烟波把釣竿虛名偶然博高官
多情江上團團日
猶照當年苜蓿盤

玉關人老貂裘傲白雪歌寒鐵硯存
已辦輕車隨款段
尋幽日日水西村

夢裏家園思欲逃
春來花事委塵泥
黃花未放東籬色
且趁香風看木樨

平生造物無多取
惟有江山興不廉
收拾詩篇在胷次
今宵魂夢也須甜

秋風燕薊寒颼颼
江南餘暑汗欲流
亦知南北本殊候
炎涼勘破消煩憂

一尊休放酒盃空
報答江頭拂面風
故舊相迎莫深問
人生半醉半醒中

風霜飽歷信交難
又見江湖白鴈寒
說盡悲歡三百首
不逢知己不教看



上赴行風看本梅
平身造物無多取
今將曉夢想須甜
秋風流韻來應曉
一樽休放酒
人生半醉半醒
風雲飽歷信交
不遠知已不



見江湖白鳥
說盡世間
三百首
揚而風
知南北
不殊
在行次







